

wjele wjace za džěło, dyžli kołtk holanskeho nimašnika w Hornich Brusach abo Sprjowjach. Najwjace džěła pak je měł wusaty Krjepjel...

Wy njeznajeće wusateho Krjepjela?

Wusaty Krjepjel je najslawniši ze serbskich kubołćikow. Je to kubołćik stareho Serbskeho domu, kiž je stał na rózku Lawskich hrjebjow a Wonkowneje lawskeje hasy w Budyšinje. Bě to prastary džědźičk, starušk staruški, tón wusaty Krjepjel. Běše so znał a so kmótril hižo ze starym brodatym Janom Arnoštom Smolerjom a z Janom Dejku a samo hižo z Abrahamom Frenclom a što wě, hač njepomnješe hišće časy pohanstwa. Tójšto wěkow je kubołćikował w starym Budyšinje, ale najbóle hordy běše, hdyž móžeše přewzać kubołćistwo nowonatwarjeneho Serbskeho domu při Lawskich hrjebjach. To džě žane smorženki njejsu na prawdu hladać w tajkim wulkim twarjenju: woprašće so jenož Gustawa Janaka abo domownika Nowaka! Tola wusaty Krjepjel sebi radu wědžeše a derje zastawaše swoje domownistwo a dwórnistwo w Serbskim domje: w čišćerni a redakciji, w muzeju a kofejowni a w bance, w kniharni a Domowinje a po wšěch bydlenjach, na hornjej łubi a po schodže a w pincach a kólnjach a na dworje kołowokoło Mukoweje lipy a na Smolerjec wutwarku. Wězo běše jako rodzeny kubołćik tež trochu šibały a ludźi druhdy rady škrěješe a jim psy za wopuš wjazaše. Tak hlownemu redaktorej Markej Smolerjej wody do čornidla liješe a muzejownikej kluč schowa runje, hdyž bě přišoł wuznamny hósć z Prahi abo Kulowa. Abo wón nadžěła w stajerni telko zmylkow, zo móhl knjez faktor sej włosy z mjerzanjom dowutorhać, hdyž